


Heidi Guttorm Einarsen

Govaid sárgon: Charlotte Helgeland



Birehis lea čoavjebávččas



Biret lea viđa jahkásaš ja dábálaččat son lea hui movttesis nieida. Muhto otne ii leat nu movtta. Birehis ii leat miella vuolgit mánáidgárdái. Sus lea guhkká čovji unohastán ja manimus áigge dat lea eambo vel bávččadišgohtán. Son ii sáhte ii boraditge iđitborramuša maid eadni lea láchán beavdá. Vaikke das leat buot dakkár láibesuvllit maida son liiko; vuovvasmeastu, muorjemeastu ja meadđennjuvddus.



Biret boahdá mánáidgárdái. Doppe bargá Jenny. Jenny dohppe Bireha askái, buorresta ja dadjá movttegis jienain buorre iđit Birehii. Muhto Birehis ii leat nu buorre iđit. Son ii illut ja šatta movtta go boahdá mánáidgárdái. Jenny oaidná ahte Birehis lea juoga maid son smiehtá.



Go Biret lea nuoladan ja veaháš buđaldan bihttaspealuiguin, de Jenny bivdá su fárrui ságastanlatnjii.



Doppe Biret čierugoahtá ja son čieru guhkká. Jenny váldá su askái ja doallá ja vuhtoda su. Dađistaga sihkku gatnjaliid ja muitališgoahtá ahte mañimuš áigge lea Aila, gii lea su buoremus ustit, stoahkan dušše Ovláin mánáidgárddis. Soai leaba huksen birccuiguin, čierastaddan ja njoarostaddan. Aila ii leat oaidnán, ii ge hállan, ii ge jearran sus maidege. Son lea báhcán okto sárgut ja hukset legoiguin. Biret dovdá ahte su buoremus ustit Aila lea guođđán su. Son dovdá ahte son ii beasa fárrui čierastaddat, njoarostaddat ja birccuiguin hukset. Danne ii leat šat nu somá vuolgit mánáidgárdái. Sus lea nu čoavjebávččas ahte son ii veaje viegadi, njuikkodit ja suohtastallat. Muhto dál son dovdagoahtá ahte čoavjebávččas váidu veahá.



Jenny čohkká ja guldala maid Biret muitala. Son ádde ahte Birehis lea váivi, lossat ja ahte son morašta buoremus ustibis. Ságastallanbottus mánáidgárrdis sii háleštit dan birra manne muhtimin sáhtta dovdat ahte ii beasa fárrui. Sii ságastit dan birra ahte galgá muitit bovdet buohkaid fárrui go áigu stoahkat dahje jos fuomáša muhtin stoahká okto. Sii ságastit maid dan birra ahte galgá muitalit jos muhtin láhtte fasttet earáiguin.



Go beassá mitalit ja ságastit earáiguin dan birra maid dovdá, de mannet čoavjebákčasat eret. Aila ja Biret stoahkaba fas ovttas. Muhto Biret sáhtta dál stoahkat maiddái Ovlláin, Jovnnain, Ristenin ja Elsen. Go mii buohkat muitit bovdet buohkaid fárrui stoahkat, de šaddá ollu somát buohkaide mánáidgárddis.

Pedagogalaš bagadeapmi

Ságastehket mánáiguin dan birra man dehálaš lea ahte mii buohkat illudit boahit mánáidgárdái juohke beaivve. Muhtimin mii dovdat ahkidisvuoda, láittasvuoda ja morraša. Dalle fertet mii hállat/hupmat dan birra. Lea áibbas lunddolaš ahte muhtumin dovdá váivvi, morraša, láittasvuoda, bahávuoda ja morraša. Ii oktage leat álo ilus ja movtta, muhto mii galgat hállat ja čielggadit ja geahččalit veahkehit guđet guimmiid go mii dovdat morraša, váivvi ja oktonasvuoda.

Jos mánná dovdá ahte son mánáidgárddis olgguštuvvo ja givssiduvvo, de lea dehálaš sirdit ovddasvástádusadovddu ja “siva” mánás eret. Sivva lea, ja galgá sirdojuvvot rávisolbmuide ja mánáidgárdái ja čielgasit galgá komuniserejuvvot sihke mánnái ja váhnemiidda gean dat lea sivva ja ovddasvástádus givssideami eastadit ja bissehit. Muđui sáhtta mánná dovdat dat lea su iežas “sivva” ja ovddidit fuones iešgova ja guottuid iežas ektui mat sáhttet bistit guhkes áiggi, soaitá eallinagi.

Mánáid galgá ávžžuhit dieđihit jos sii dovdet dahje oidnet earáid geat olgguštuvvojit ja givssiduvvojit. Dalle sáhtta neavvut givssideaddji ja veahkehit su gii givssiduvvo. Mánáin leat mángii alcceseaset buorit evttohusat ja oidnet áššiid maid bargit ja rávisobmot eai oainne ja fuomáš. Mánát sáhttet maid evttohit/digaštallat man láhkai bargit sáhttet buoremusat veahkehit.

Givssideapmi lea fáddá maid ii leat ávki dušše oktii dahje guktii jagis sággastit. Dainna ferte bargat juohke beaivvi mánáidgárddis.

